

ASSEMBLEA DI A GIUVENTÙ DI A CORSICA

**SESSIONI URDINARIA DI U 2025
RIUNIONI DI L'11 DI LUDDU DI U 2025**

N° 2025/M4/11

MUZIONI

(CÙ DUMANDA D'ESAMI PRIURITARIU)

- **DIPUSITATA DA : ANGE-TOUSSAINT BARTOLI PÀ U GRUPPU « CHJAMA À L'UNITÀ »**
 - **UGHJETTU : SUSTEGNU A I CRISTIANI D'ORIENTI**
-

CUNSIDARENDU chì l'articulu 18 di a Dichjarazioni universali di i diritti di l'omi « Ogni parsona t'hà u dirittu di a libartà di pinsà, di cuscenza è di rilighjoni ; 'ssu dirittu invoglia a libartà di cambià di rilighjoni o di cunvizzioni è dinnò a libartà di mostrà a so rilighjoni o a so cunvizzioni sola o in cumunu, in publicu o in privatu, par l'insignamentu, i pratici, u cultu è l'addempientu di i riti »

CUNSIDARENDU chì l'attualità di 'ss'ultimi ghjorna hè assai preoccupanti, in particolari annant'a situazioni di i cristiani in u Mezu Urienti mà dinnò in Africa

CUNSIDARENDU chî st'attualità, missa in risaltu par via di l'ultimi rapporta nant'à a libartà rilighjosa di l'opara pontificali « Aide à l'Eglise en détresse » faci u custatu chî:

- U niveddu di viulenza è di riprissioni contr'à gruppi rilighjosi s'hè appighjaturu
- 62,5% di a pupulazioni mundiali campa in paesi induva a libartà rilighjosa hè minaciata, ciò chì raprisenta 62 paesi
- 28 paesi sò classificati in a catiguria di parsicuzioni i più forti, par asempiu u Nicaragua
- A libartà rilighjosa hè andata di mali in peghju dapoi l'ultimu rapportu di u 2021

CUNSIDARENDU chî un attentatu hà toccu u 22u di ghjunghju, durante un uffiziu, a ghjesia urtodossia Mar Elias, in Damas, fendu 22 morti è 52 feriti

CUNSIDARENDU chî ùn sò micca i primi parsicuzioni di pettu à i cumunità di cristiani in u Mezu Urienti, causendu una calata di u numaru di cristiani in stu rughjonu, com'è in Irak induva u numaru di praticanti hè calatu di 90%, passendu di più d'un millionu in 2003 à 100 000 oghji

CUNSIDARENDU chî st'esodiu, sti spiazamenti di pupulazioni, sti persecuzioni è sti scumpieri sò un frenu inaccitevuli à l'emancipazioni di i pupulazioni di sti paesi chî cunoscini a verra civili o a tiucrazia

CUNSIDARENDU chî un incertudina asisti pà 'ssi pupulazioni cristiani in Siria, dopu à a fini di u righjimu di Bachar al-Assad l'ottu di dicembri passatu, è a presa di u puteri d'Ahmed al-Charaa, chî malgradu i dichjarazioni di paci versu i minurità rilighjosi, cumincia un' islamisazioni di a sucietà, fendu pisà un risicu nant'à ogni cristianu chî voli praticà a so rilighjoni.

CUNSIDARENDU chî, in a notti di u 25 a u 26 di ghjunghju di u 2025, culoni israeliani ani attaccatu parichji paesi palistiniani, trà iddi in particolari u paesu di Taybeh, ultimu paesu à maghjorità cristiana in u rughjonu

CUNSIDARENDU chî, trà i 2,4 milioni d'abitanti di a banda di Gaza, circa 750 sò cristiani, è chî sicondu à u Central Bureau of Statistics, in 2022, ci era in Israel 185 000 cristiani, sia 1,9% di a pupulazioni contr'a 11% un seculu fà.

CUNSIDARENDU chî i ghjesgii cristiani sò tuccati o distrutti da i bombardamenti, impidindu a pratica nurmali di u cultu

CUNSIDARENDU chî 'ssi pupulazioni ùn ani nisuna spienza altra che l'esiliu pà campa normalamenti è praticà a so rilighjoni in libartà.

CUNSIDARENDU chî u Mezu Urienti hà vistu nascita u cristianisimu è chî i cristiani d'Urienti sò una di i più vechji cumunità prisenti in u rughjonu, oparendu pà a paci è u dialogu trà i rilighoni è i minurità

CUNSIDARENDU chî a Corsica fù a prima tarra d'Auropa à accodda à u XVIIu sèculu una cumunità di i cristiani d'urienti, Grechi di u Pelopponesu, stallata in Carghjese, fughjindu i persecuzioni dopu à a cunquista di a Grecia da l'Imperiu Ottumanu in 1533, è chî s'hè sviluppata cuntendu oghji 3000 praticanti è una ghjesgia unica in u mondu, a Ghjesgia Greca ellena.

CUNSIDARENDU chî a tularenza rilighjosa è u dirittu di i populi à campà nant'à a so tarra sò valori impurtantissimi di a Corsica, sciuti di a lascita di Pasquali Paoli, di a Custituzioni di u Reami Anglo-Corsu, è chî 'ssu spiritu hè statu mantinutu da Nabulionu Bonaparti à traversu à l'accolta di a cumunità greca melcita in Francia dopu à a campagna d'Egipta.

CUNSIDARENDU chî stu sustegnu ùn hè micca fattu nant'à a solidarietà rilighjosa mà chî hè una chjama à a citadinanza è à una laicità di pienu dirittu

CUNSIDARENDU chî a Corsica ùn pò micca stà silenziosa in faccia d' un disastu umanu è civilisaziunali cusì impurtanti

CUNSIDARENDU chì U Papa Francescu, nanzi à a so vinuta in Aiacciu, in una lettara scritta u 7 di uttrovi di u 2024, dinunciaia u silenziu di a cumunità internaziunali è i cundizioni di vita di i pupulazioni cristiani in Gaza, ublicatti di lacà i so tarri, è dumandaia à i catolichi di u mondu sanu di mubilizasi par via d'una veghja di prighera u 7 d'uttrovi pà a paci in Israel.

CUNSIDARENDU chì u so successori, u Papa Leonu u XIVu, à u principiu di u so pontificatu, hà lampatu u listessu missaghju di sustegnu, insistindu nant'à a mancanza di forza di u dirittu internaziunali è chjamendu i cristiani d'urienti à campà nant'à i so tarri pà mantena u cristianismu in u rughjonu chì l'hà vistu nascia

CUNSIDARENDU chì, d'apress'à u rapportu d'attività di u Rappurtori spiciali annant'à a libartà di rilighjoni o di cunvizzioni, prisintatu à l'Assemblea Ghjinirali di i Nazioni Uniti di u 13 d'aostu di u 2012, « a rilighjoni o a cunvizzioni ùn sò micca simplici articuli scritti in u catalogu di robba di cunsumazzioni chì l'aienti poni piddà o lacà suvitendu i so gusti o prifirenzi »

CUNSIDARENDU chì l'Assemblea di a Ghjuventù hà dighjà presu una pusizioni unanima di sustegnu pà i Cristiani d'Urienti in a so sissioni di u 30 d'Uttrovi di u 2017.

L'ASSEMBLEA DI A GIUVENTÙ DI A CORSICA

PORTA u so sustegnu tutali à tutti i cumunità cristiani d'Urienti, mà dinò à tutti i cristiani persecutati in u mondu sanu, è à tutti i praticanti di tutti i rilighjoni minicciati in a so libartà di creda.

DINUNCIA tutti i persecuzioni fatti annant' à i cumunità cristiani

DICHJARA vulè metta in opara i mezi di cummunicazioni, d'infurmazioni è di sinsibilisazioni nant' à a situazioni di sta cumunità

S'INCHIETA di u silenziu inaccitevuli di a cumunità intarnazionali, europeana è corsa nant' à 'ssi sughjeti

CIRCA à purtà tutta l'aiuta necessaria par via di tutti i mezi ligali, i stituzioni, urganisazioni, associi oparendu in l'aiutu a i Cristiani d'Urienti è a i vittimi di a mancanza di libartà rilighjosa.

S'IMPEGNA pà a ricerca di scambi trà l'università di u Mezu Urienti è l'Università di Corsica pà permetta à i studianti di cuntinuà a studià di manera libera è di luttà contr'a a fughjita di l'intillituali ch' minaccia sti paesi